

— 237 —

GUERZEN

Loeizig e Rohalleg

Bonjour d'oh hui Loeizhun mi - gnon Loeizig er
 Ro - hal - leg Na deit hui ge - nemb de bar - don
 Sant Fieg er Faüed

I

— Bonjour d'oh hui Loeiz, hur mignon Loeizig er Rohalleg
 Na deit hui genemb de bardon Sant-Fieg er Faüed,

II

— Nen dein ket genoh de bardon Sant-Fieg er Faüed,
 Disul 'on bet 'hobér me fask barh é borh Langonned.

III

Disul 'on bet 'hobér me fask barh é borh Lanngonned ;
 Mar gouiehé mem brér bèleg sur 'vehen skandellet. (1)

IV

Deit atañ genemb de bardon Sant-Fieg er Faüed
 Ni zou tri kansortig fidél ag er memb bro saüet.

V

Ni zou tri kansortig fidél ag er memb bro saüet,
 Ha ni zei ar un dro d'er gér ; n'hou pou ket droug erbet.

VI

Pe oé Loeiz er Rohalleg doh en daul é koéniein :
 — Izellat mat e hra en héaul, mal e vou d'emb finein.

(1) *Gronjé.*

VII

— Deusto ma kuhehé en héaul, seüel e hrei el loér,
Ni zou tri kansortig fidél, ni iei genoh d'er gér.

VIII

Meit a pe oent oeit én hent, un tammig avanset,
Pe oent é pas adrest ur glud, ou devoé ean lahet.

IX

Pe oent é pas adrest ur glud, ou devoé ean taulet ;
Seih taul koutel en é gorr bras, start ou devoé boutet.

X

Ha koutellet e oé dehé, tréz-didréz é gorr bras
Ken ne gavent ket mui léh eit ou houtelleu bras.

XI

Meit achapet e oé geté én ur park bras labour
Ha ean goulén é dad, é vam de zonet d'er sekour.

XII

— Goulennet hou mam ha hou tad en nemb e gareet...
Rak biruikin un tam bara 'n ou zi ne zèbreet.

XIII

— Eutru, men Doué, me sekouret, perak ne varián ket,
Ma relegeu santéz Barban é kornig me jilet.

XIV

Ma relegeu santéz Barban édan kornig mē sé
A pe vou lamet er ré-zé, me variou é grès Doué.

XV

Hag ind gobér ur chonj nezé hag ur chonjig ker ber
Ind er samas ar ou diskoé hag er hasas d'er stér.

XVI

Pe oé Loeizig er Rohalleg ar en deur é néañual,
É oé é vlèuigeu milén displéget ar é dal.

XVII

Ha ean houlennas dré der guéh Moris er Rohalleg :
— Deit hui de anzaéin hou mab zou ar en deur béet.

— 239 —

XVIII

Deit hui de anzañein hou mab zou ar en deur béet
Ha kaset ean de interrein de vèred Lanngoned

XIX

Hui er hasou de interrein de vèred Lanngoned
Ha hui el lakei én ur bé é kevér er porched.

XX

Ha hui el lakei én ur bé é kevér er porched,
Léh ma pasou en dud iouank é vont d'en ovren bred.

XXI

Léh ma pasou en dud iouank é vont d'en ovren bred ;
Ind ' larou en eil d'égilé : « Loeizig er Rohalleg. »

XXII

Ind ' larou en eil d'égilé : « Loeizig er Rohalleg »
E oé lahet ur sul d'en noz get é gameraded.

XXIII

E oé lahet ur sul d'en noz get é gameraded
A pe oé tonet a bardon Sant Fieg er Faüed.

DASTUMET GET *BRANGILI.*

DRAMSEL
AR ER MIZ TREMÉNET

— Loeiz Herrieu ha Vedig en Evel e zou gañnet ur mab dehé. Guinél-Loeiz e ma lakeit. Sant Guinél e zou er sant bras hont en devoé predeget en Aviel ha groeit karein Breih é kornad Penhored en amzér guéharal. Chetu er getan guéh a houdé meur a gant vlé merhat e ma reit é hanù d'ur broédur ér hor nad-sé. Rereñ sant Guinél ma vou é fillor haval dohton !

— Aveit er getan guéh én Oriant é hés guélet aficheu é bre honeg. Staget e zou bet un trohad anehé ha lénét int bet. *Konzamb brehoneg ha lénamb Dihunamb* chetu er péh e oé merchet arnehé. I. En Dibredér en des bet ar chonj vat-sé ha ean en des ean kaset eùe de ben. Dehon er meud enta !

— E miz Imbrill é terèou endro er ré e zou de ben é *Brediah er brehoneg* de vonet ag ur barréz d'en aral, d'er sul, d'hobér skol d'er vugalé. Er ré e ven bout chervijet ketan n'ou des nameit skriù de Loeiz Herrieu.